



册府元龜  
卷之四百二十五  
至二十七

上海图书馆  
13  
849  
140



門 4 3  
號 849  
卷 140



册府元龜

淮南李嗣京參閱

西極文翔鳳訂正

濠章黃國琦較釋

將帥部 八十六

南齊成買為軍主戍角城太祖建元三年魏寇淮陽  
圍角城買謂人曰我今作角城戍我兒當得一子或  
問其故買曰角城與虜同岸危險具多我豈能使虜  
敢南向我若不沒虜則應破虜兒不作孝子便當作

世子也至是魏園買數重帝遣領軍將軍李安民爲  
都督救之勅周盤龍曰角城遶日賊始復進西道便  
是無賊卿可率馬步下淮陰就李領軍鍾離船少正  
可致依仗數日糧軍人挾淮步下也買與魏拒戰手  
所傷殺無數晨朝早起手中忽有數升血其日遂戰  
死

張佛護爲驍騎將軍崔惠景舉兵奉江夏王寶玄向  
關臺遣佛護及直閣將軍徐元稱屯騎校尉姚景珍  
西中郎將軍徐景知遊盪主重伯珍騎官桓靈福等  
據竹里爲敎城寶玄遣信謂佛護曰身自還朝君何

意苦相斷遏佛護答曰小人荷國重恩使於此創立  
小戍殿下還朝但自直過豈敢干齡遂射惠景軍因  
戰惠景子覺及崔恭祖領前鋒皆僉楚善戰又輕行  
不爨食以數舫沿江載酒空爲軍糧每見臺軍城中  
煙火起輒盡力攻擊臺軍不復得食以此饑困元稱  
等議欲降佛護不許十二日恭祖等復攻之城陷佛  
護單馬走追得斬首  
尹畧爲遊擊將軍武帝永明八年討巴東王子響見  
害贈輔國將軍梁州刺史  
席謙父恭穆任鎮西司馬爲魚復侯所害及謙爲新

蔡太守鎮湓城聞梁王義師東下曰我家世忠貞殞死不二爲陳伯之所殺

梁韋粲爲衡州刺史武帝太清三年侯景反至京師與司州刺史柳仲禮高州刺史李遷仕帥軍入援粲仲禮分據南岸正月丁巳賊濟軍於青塘襲破粲營粲拒戰而死戊辰李遷仕天門太守樊文皎進軍青谿東爲賊所破文皎死之

杜岸爲平北將軍北梁州刺史請襲襄陽元帝許之岸乃晝夜兼行先往攻其城不剋岳陽王至遂走保其兄嘯於南陽嘯時爲南陽太守岳陽王尋遣攻陷其城岸及嘯俱遇害

胡僧祐爲車騎將軍西魏寇至元帝以僧祐爲都督城東諸軍事魏軍四面起攻百道齊舉僧祐親當矢石晝夜督戰獎勵將士明於賞罰衆皆感之咸爲致死所向摧殄賊莫敢前俄而中流矢卒

裴之橫爲吳興太守江陵既陷北齊遣上黨王高渙挾貞陽侯明攻東閩安王承制以之橫爲使持節鎮北將軍徐州刺史都督衆軍給鼓吹一部出守蘄城之橫營壘未周而魏軍大至兵盡矢窮遂於陣沒贈侍中

司空

裴畿爲太子右衛率雋州刺史西魏攻陷江陵畿力戰死之

陳馬明字世朗梁元帝時爲散騎嘗侍北交州刺史領廬江太守荊州陷沒歸於高祖紹泰中復官位封西華縣侯隨周文育督征王琳於沌口軍敗明力戰死之贈使持節征西將軍郢州刺史

周鐵虎爲嚴威將軍初自梁歸於陳尋隨周文育於江南拒蕭勃嘗爲前軍文育又命鐵虎偏軍於苦竹灘襲勃前軍歐陽頔又隨文育西征王琳於沌口敗績鐵虎與文育安侯都並爲琳所擒琳引見諸軍將

與之語唯鐵虎辭氣不屈故琳盡宥文育之徒獨鐵虎見害

陳詳爲神威將軍吳州刺史天嘉五年周廸復出臨川乃以詳爲都督率水部討廸軍至南城與賊相遇戰敗死之

始興昭烈王道談高祖兄也仕於梁世爲東宮直後主帥侯景之亂領弩手三千援臺城中流矢卒

後魏魏勤封永安侯明元永興五年與將軍元屈會稽公劉潔等擊吐京叛胡失利潔被傷勤死之

司馬天助晉驃騎將軍元顯之子歸魏拜青徐二州

刺史太武真君三年從駕北征在陣歿

羅雲獻文時爲給事中西征勅勒爲賊所襲殺

章武王融弟武爲光祿大夫賊帥鮮於修禮寇暴瀛  
定二州長孫雅等討之失利除融車騎將軍爲前駟  
左軍都督與廣陽王淵等共討修禮師渡津葛榮殺  
修禮而自立轉營至白牛邏輕騎擊融融苦戰終日  
更無外援遂大奔敗於陣見殺

崔延伯爲右衛將軍討万俟醜奴爲其所敗復收兵  
襲賊大破之賊皆退而兵人採掠散亂不整還來衝  
突遂大奔敗延伯中流矢爲賊所害士卒死者萬餘

人

李龍環以勇壯爲將孝明正光中北征戰死白道

裴衍爲北道大都督與源子邕北討葛榮軍次陽平  
之東北陽曲賊來拒戰衍軍敗見害朝野人情莫不  
駭惋

崔楷爲殷州刺史孝昌三年葛榮陷殷州楷固節死  
之

酈暉爲征虜將軍與唐州刺史崔元珍固守平陽武  
大中爾朱榮稱兵赴雒暉與珍不從其命爲榮行臺  
郎中樊子鶴所攻城陷被害崔元珍爲唐州刺史爾

朱榮之趣雒也遣其都督樊子鵠取唐州元珍與行  
臺鄺惲拒守不從為子鵠所害  
裴約為別將行渤海郡事時冀州大乘賊起約為賊  
所敗遂圍郡城城陷見害

元志為雍州刺史時莫折念生反詔志為西征都督  
討之念生遣其弟天生屯龍口與志相持為賊所乘  
遂棄大衆奔還岐州賊遂攻岐州刺史裴芬之疑城  
人與賊潛通將盡出之志不聽城人果開門引賊鎖  
志及芬之送念生見害節閔初贈尚書僕射  
奚文為散騎常侍從征蠕蠕戰沒

尉豹行潁州事與梁將裴禮戰沒  
丘跋為安遠將軍征蓋吳戰沒

高徽孝明時使嘑噠迴至河州前刺史息景進等招  
引莫折念生攻河州長史元永等推徽行州事別駕  
乞伏世則潛通景進徽殺之徵兵于吐谷渾吐谷渾  
率衆救之景進敗退走奔秦州景進尋率羗夷復來  
攻逼徽遣統軍六景相馳表請師詔徽仍行河州事  
久無援救力屈城陷為賊所害  
李喬為使持節大將軍陝州刺史宇文黑獺攻陷州  
城被執見害

崔伯鳳爲前將軍孝莊永安末與都督源子恭守丹  
父戰沒

崔伯麟爲中堅將軍冀州長史大乘賊起伯麟率州  
軍討之於煇棗城爲賊所殺贈龍驤將軍雒州刺史  
李苗爲冠軍將軍討爾朱世隆於河南橋兵盡浮河  
而沒苗死之日朝野悲壯之及世隆入雒王者追苗  
贈封白世隆世隆曰吾爾時群議更一二日便欲大  
縱兵士焚燒都邑任其採掠賴苗京師獲全天下之  
善一也宜追之

薛長瑜爲征東將軍雒州刺史擊賊沒于陣贈都督

冀定泰三州諸軍事車騎將軍冀州刺史

寇治爲前將軍時蠻反於三鴉治爲都督追討戰沒

贈持節都督雍華岐三州諸軍事

鄭模爲征東將軍行岐州事未幾擊賊深入沒於陣

贈撫軍將軍相州刺史

裴仲規以司徒主簿免久之中山王英征義陽引爲

統軍奏復本職規陣戰歿贈河東太守謚曰貞

孫瓚爲姚泓安定護軍時赫連屈子來侵人懷危懼

亡奔者相屬瓚獨率衆拒守見殺

李長壽爲華州刺史孝武西遷長壽率勵義士拒諫



魏孝武嘉之復授潁州郡守遷廣州刺史東魏遣行臺侯景率兵攻之長壽衆少城陷遂遇害

崔仲哲爲別將初父康爲燕州刺史時天下多事遂爲杜雒周攻圍康堅守歷年朝廷遣都督元譚與仲哲赴救到下口遇賊仲哲戰沒

北齊尉興敬爲神武帳內都督高祖敗周文帝於邕山興敬因戰爲流矢所中卒贈涇岐幽三州軍事

尉興慶爲神武親信都督帝與西魏戰退走從者六人追騎至興慶曰王去矣興慶腰邊百箭足殺百人神武勉之曰事濟以爾爲懷州若死則用爾子興

慶曰兒小願用兄許之興慶鬪矢盡而死

高昂爲軍司大都督與侯景等同攻獨孤如願于金墉城周文帝率衆救之戰於邙陰昂所部失利左右分散單騎東出欲趨河梁南城門閉不得入遂爲西軍所害

劉豐自左將軍除殷州時西魏大將王思政據長社文襄命豐與清河王岳攻之豐建水攻之策遂遏洧水以灌之水長魚鱉皆遊焉九月至四月城將陷豐與行臺慕容紹宗見北有白氣同入船忽有暴風從東北來正晝昏暗飛沙走礫船纜忽絕漂至城下豐

逝水向土山爲浪所激不時至西人鈎之並爲敵人  
所害豐壯勇善爲諸將所推死之日朝野駭惋  
王琳爲特進侍中時陳將吳明徹來寇秦州琳與戰  
大敗單馬突圍僅而獲免明徹進圍之堰淝水灌城  
而皮景和等屯於淮西竟不赴救明徹晝夜攻擊城  
內水氣轉侵人皆患腫死病相枕從七月至十月城  
陷被執百姓泣而從之明徹恐其爲變遂殺之  
慕容紹宗爲河南道行臺拒西魏大將王思政兵敗  
投水而死三軍將士莫不悲惋

元景安天統中爲領軍大將軍入周以大將軍義寧  
郡開國公率衆討稽胡戰沒

後周王勵爲千牛直長沙苑之役勵以都督領兵從  
太祖勵居左翼與帳下十數人用短兵接戰當其前  
者死傷甚衆勵以被傷重遂卒于行間太祖深悼焉  
楊樹爲少師武帝保定四年十月詔晉公護率軍伐  
齊出潼關大將軍權景宣出豫州樹出柘關蜀國公  
尉迥率師圍雒陽景宣攻齊豫州護次陝州十二月  
齊師渡河晨至雒陽諸軍驚散尉迥率麾下數十  
騎扞敵得却至夜引還柱國庸國公王雄力戰死之  
遂班師楊樹於軹關戰沒權景宣亦棄豫州而還

帝祐字法保為驃騎大將軍東魏遣軍送糧饋宜陽法保潛邀之轉戰數十里兵少不敵為流矢所中卒於陣

韋總從武帝東征總每率麾下先驅陷敵遂於并州戰沒

王雄從晉公護東征至甚山與齊將斛津明月接戰雄馳殺三人明月退走雄追之明月左右皆散矢又盡唯餘一奴一矢雄案稍不及明月者支餘曰惜爾不殺但生將爾見天子明月反射雄中額馬退走至營而薨

劉雄為上大將軍出鎮幽州宣政元年四月突厥寇幽州擽略居民雄出戰為突厥所圍臨陣戰沒贈亮州總管十州諸軍事亳州刺史

楊祥為建武將軍討鮮于修禮遂死之隋權武父襲慶為周開府從武元皇帝戰於并州被圍百餘里襲慶力戰矢盡短兵接殺傷甚衆於是刀稍皆折脫胄擲地向賊大罵曰何不來斫頭賊遂殺之

柳雄亮父檜為周華陽太守遇黃寶作亂攻陷華陽檜為賊所害

皮子信爲旭州刺史開皇初吐谷渾來寇邊子信出  
兵拒戰爲賊所敗子信死之

趙世模爲上開府開皇初嘗典宿衛後從晉王伐陳  
先鋒遇賊力戰而死

韋洸開皇中爲廣州總管歲餘番禺夷王仲宣聚衆  
爲亂以兵圍洸洸勒兵拒之中流矢而卒贈上柱國  
劉弘開皇中爲泉州刺史會高智慧作亂以兵攻州  
弘城中守百餘日救兵不至前後出戰死亡大半糧  
盡無食與士卒數百人煮犀甲腰帶及剥樹皮而食  
一無離叛賊知其饑餓欲降之弘抗節彌厲賊悉衆

來攻城陷爲所害

楊武通爲左武衛將軍歷岷簡二州總管與周法尚  
討嘉州叛獠法尚軍初不利武通率數千人爲賊斷  
其歸路武通於是束馬懸車出賊不意頻戰破之賊  
知其孤軍無援傾部落而至武通轉鬪數百里爲賊  
所拒四面路絕武通輕騎接戰墜馬爲賊所執殺而  
噉之

李崇爲幽州總管開皇中突厥大爲寇掠崇率步騎  
三千拒之轉戰十餘日師人多死遂保於砂城突厥  
圍之城本荒廢不可守禦曉夕力戰又無所食每夜

出掠賊營復得六畜以繼軍糧突厥畏之厚其脩葺夜中結陣以待之崇軍苦饑出輒遇敵死亡畧盡遲明奔還城者尚且百許人然多傷重不堪更戰突厥意降之遣使謂崇曰若來降者封爲特勒崇知必不免命其士卒曰崇喪師徒罪當死今日效命以謝國家待看吾死且可降賊方便散走努力還鄉若見至尊道崇此意乃挺刃突賊復殺二人賊亂射之卒於陣

楊崇封秦興縣公從行軍總管達奚長儒擊突厥於周槃力戰而死贈大將軍豫州刺史以子義臣襲崇官爵

楊思恩爲車騎將軍煬帝嗣位漢王諒作亂并州時代州總管李景爲漢王將喬鍾葵圍之詔朔州總管楊義臣救之義臣率馬步二萬夜出西陁遲明行數十里鍾葵覘見義臣兵少悉衆拒之鍾葵亞將王拔饒勇善用稍射者不能中每以數射啗陣義臣患之募能當稍者思恩請當之義臣見思恩氣貌雄勇顧之曰壯士也賜以卮酒思恩望見拔立於陣後投觴於地策馬赴之再往不尅義臣復選騎士千餘人從之思恩遂突擊殺數人直至拔麾下短兵方接所從

騎士退思恩爲拔所殺拔遂乘之義臣軍北者十餘里於是購得思恩屍義臣哭之甚慟三軍莫不泣所從騎士皆腰斬

周羅暉爲右武侯大將軍漢王諒餘黨楊晉絳等三州未下詔羅暉行絳晉呂三州諸軍事進兵圍之爲流矢所中卒於師

張定和爲右屯衛大將軍從煬帝征吐谷渾至覆袁州時吐谷渾主與數騎而遁其名王詐爲渾主保車我真山帝命定和率衆擊之旣與賊相遇輕其衆少呼之令降賊不肯下定和不被甲挺身登山賊伏兵

於巖石之下發矢中之而斃其亞將柳武建擊賊悉斬之帝爲其流涕

梁默爲柱國行軍總管大業五年從煬帝征吐谷渾遇賊力戰而死

李瓊爲右翊衛將軍大業五年吐谷渾王率衆保覆袁州帝遣左光祿大夫梁默與瓊追渾王皆遇賊死

馮孝慈爲右武侯衛將軍大業九年清河賊張金稱衆數萬孝慈討金稱於清河反爲所敗孝慈死之楊達煬帝遼東之役領右武侯衛將軍進位左光祿大

夫卒於師煬帝歎息久之贈吏部尚書始安侯謚曰恭贈物三百五十段  
麥鐵杖爲右屯衛大將軍煬帝待之逾密鐵杖自以荷恩深重每懷竭命之志及遼東之役請爲前鋒顧謂醫者吳景賢曰大丈夫性命白有所在豈能艾炷灸頰瓜蒂敷鼻療黃不差而卧死兒女手中乎將渡遼謂其三子曰阿奴當備淺色黃衫吾荷國恩今是死日我旣被殺爾當富貴唯誠與孝爾其勉之及濟橋未成去東岸尚數丈賊大至鐵杖跳上岸與賊戰死武賁郎將錢士雄孟金父亦死之左右更無及者

帝爲之流涕

梁文謙大業中爲鷹揚將軍從衛玄擊楊玄感於東都力戰而死贈通議大夫  
張須陁大業中爲齊郡通守領河南道十二郡黜陟討捕大使將兵拒東郡賊翟讓前後三十餘戰每破走之轉滎陽通守時李密說讓取雒口倉讓憚須陁不敢進密勸之讓遂與密率兵逼滎陽須陁拒之讓懼而退須陁乘之逐北十餘里時李密先伏數千人於林間邀擊須陁軍遂敗績密與讓合軍圍之須陁潰圍輒出左右不能盡出復躍馬入救之往來數四

衆敗散乃仰天曰兵敗如此何面見天子乎乃下馬  
戰死  
郭絢大業末爲涿郡通守將兵擊竇建德於河間戰  
死人吏哭之數月不息  
源崇嗣大業中自上黨贊治入爲尚書虞部郎及天  
下盜起將兵討北海賊與賊力戰而死贈正議大夫  
王辯爲武賁郎將與王世充討李密於雒口官軍大  
潰辯至維水橋已壞不得渡遂涉水至中流爲溺人  
所引墜馬辯時身被重甲敗兵前後相陷藉不能復  
上馬竟溺死三軍莫不痛惜之

陰世師大業末爲左翊衛將軍與代王留守京師及  
唐公義軍至世師自以世荷隋恩又藩邸之舊遂勒  
兵拒守月餘城陷與京兆郡丞骨儀等見誅  
孟善誼爲河內通守恭帝義興二年王世充爲李密  
所敗善誼與武賁郎將王辯楊威劉長恭梁德董知  
通皆死之

唐孫華馮翊人義師起歸於高祖與劉弘基等破隋  
將桑顯和於餘馬泉拜爲馮翊太守封武鄉公從圍  
京師爲流矢所中卒

劉感武德初以驃騎將軍鎮涇州薛仁杲率衆圍之



感嬰城拒守城中糧盡遂殺所乘之馬以分將士感  
一無所噉唯煮馬骨取汁和木屑食之城垂陷者數  
矣長平王叔良援兵至仁杲解圍而去感與良出戰  
爲賊所擒仁杲復圍涇州令感語城中云援軍已敗  
徒守孤城何益也宜早出降以全家室感許之及至  
城下大呼曰逆賊饑餓亡在朝夕秦王率數十萬衆  
四面俱集城中勿憂各自勉以全忠節仁杲大怒執  
感於城邊馳騎射殺之至死聲色逾厲賊平高祖購  
得其屍祭以少牢

羅士信爲絳州總管鄒國公從太宗擊黑闥於河北

有雒水人以城來降遣士信入城據守賊悉衆攻之  
甚急遇雨雪大軍不得救經數日城陷爲賊所擒黑  
闥聞其勇意欲活之士信辭色不屈遂遇害

呂子臧武德初爲鄧州刺史與馬元規擊山南賊帥  
朱粲遇霖雨城壞賊攻之急所親者知城必陷或勸  
其降子臧曰安有天子刺史降賊者乎於是率左右  
數百人赴敵而死俄而城陷元規亦遇害

李育德爲陟州刺史其兄厚德時陷王世充逃歸渡  
河爲寇所執世充囚之於獲嘉使其作書召育德育  
德陽許之故其兄擊獄久不死世充殷州刺史段大

師遣小師趙君頴以兵守之厚德陰結於君頴及城中人賈慈行謀翻獲嘉以將且待慈行與子弟奴客十餘人大呼於上云李家兵悉登城矣君頴於獄中以馬載厚德擁獄囚及援兵數十人叫譟而出至衙門門外逢僞長史趙景休斬之以徇衆皆懾伏至廳前後者數百大師踰城而遁遂尅殷州拜厚德爲刺史厚德歸省親疾遣育德居守世充怒悉衆擊之數日城育德力戰於中門之外及弟三人皆死之

趙景慈爲華州刺史領行軍總管擊堯君素於蒲州被瘡墮馬爲賊所執君素囚之十餘日景慈憤恚飲寒水數升受風而死君素斬之梟首於城外贈秦州刺史謚曰忠

何潘仁右屯衛將軍武德二年討山賊張子惠於絲竹園輕敵遇害

梁禮爲鄜州刺史封鄜城郡公武德二年梁師都侵延州禮力戰沒於陣

曹四郎爲鄧州總管武德三年九月王世充陷鄧州四郎因戰死之

張孝珉爲驃騎將軍驍勇善戰初爲王世充將軍後以衆歸國高祖令督本兵經畧世充武德三年六月

為世充所圍眾寡不敵力屈就擒見世充辭色不撓遂為所殺

盧君諤為行軍總管武德四年隨齊王元吉擊王世充世充騎將楊公信犯官軍元吉擊之反為所敗君諤死之

羅威為魏州刺史武德四年八月劉黑闥陷鄆縣威與貝州刺史戴元祥討之反為所敗威及元祥皆死

長平王叔良高祖從父弟鎮涇州武德四年胡賊入寇召叔良等五將帥師北代為流矢所中師旋道薨

盧士叡為瀛州刺史武德四年劉黑闥陷瀛州士叡死之先是黑闥之亂士叡勒兵拒守黑闥遣輕騎襲之破其羅城士叡據子城拒戰經半日士卒並河間人見羅郭已陷親屬為虜莫有鬪志皆踰城而出士叡為賊所擒遣人執之出說諸城堡士叡不從為賊所殺

李大恩為代州總管上表言馬邑可圖高祖令內殿少監獨孤晟卒兵與其合勢大恩率所部直趨馬邑晟軍不至大恩頓於新城突厥與劉黑闥合圍之高祖聞之遽令將軍李高遷為援未至大恩糧盡夜遁

死事二  
為賊所邀軍遂大潰大恩為虜所敗死之高祖聞之傷惜久之

張德政為鄆州都督武德八年八月及并州道行軍總管督兵張公瑾與虜戰於大谷我師敗績德政死之

姜確為左屯衛將軍貞觀十九年從太宗征遼東以行軍總管督兵攻盖牟城中流矢而卒

王君諤為左武衛將軍從太宗征遼東兼領左屯營兵與高麗戰於駐驛山君諤先鋒陷陣遂與賊短兵相接賊以鉞斧擊之墜馬左右不繼以至於難還卒

於營大祖深痛惜之左右坐誅者數人子及善嗣拜朝散大夫

謝萬歲為梓州都督高宗永徽元年與兗州刺史謝法興黔州都督李孟嘗討瑛州獠賊萬歲法興入洞招慰為賊所殺

來濟顯慶中為中書令左遷台州二年徙庭州刺史俄有突厥入寇濟總兵拒之謂其衆曰吾嘗挂刑網蒙赦性命當以身塞責特報國恩不擐甲胄赴賊沒於陣

蘇孝祥為右監門衛將軍則天文明元年徐敬業據

楊州與其將李導會於高郵之下阿谿列營拒守孝  
祥爲後軍總管率兵五千人夜用小艇先渡水擊之  
反爲所敗孝祥臨陣見殺兵士溺死者過半  
許欽明爲涼州都督萬歲通天元年九月吐蕃寇涼  
州欽明嘗出按行有吐蕃數萬奄至城下欽明拒戰  
久之力屈被執賊將欽明至靈州城下欽明大呼曰  
賊中都無飲食城中有美醬乞二升梁米乞二斗墨  
乞一挺是時賊營處四面阻涅河唯有一路得入欽  
明詐乞此物以喻城中冀其揀兵練將候夜掩襲城  
中無悟其旨尋遇害

王孝傑爲清邊道行軍總管萬歲通天二年孝傑與  
蘇宏暉等率兵十七萬與孫萬傑戰於東碶石谷官  
軍敗績盡陷於賊孝傑死之

牛師獎爲安西都護軍中宗景龍二年十一月與娑  
葛戰于火燒城師獎敗績沒於陣

王海賓爲太子右衛率豐安軍使以驍勇聞玄宗開  
元二年七月吐蕃入寇朝廷以薛訥攝左羽林將軍  
爲隴右防禦使禦之以海賓爲先鋒及賊至渭川西  
界武階驛苦戰勝之殺獲甚衆諸將嫉其功按兵不  
救海賓沒於陣太軍乘其勢擊而敗之斬首一萬七

千級獲馬七萬五千匹牛羊十四萬頭帝聞而憐之  
詔贈左金吾大將軍

郭英傑爲幽州道副總管開元二十一年討契丹於  
都山爲賊所敗英傑死之

褚誨爲隴右副將時皇甫惟明爲隴右節度使天寶  
四年奚及契丹酋長各殺公主舉部落以叛惟明與  
吐蕃戰於石堡官軍不利誨死之

王伯倫爲御史大夫崔光遠行軍司馬肅宗正德二  
年八月光遠於略谷破賊千餘人賊寇鳳翔伯倫與  
光遠判官李椿領兵二千人自中涓橋攻殺守橋賊

一千人伯倫等乘勝至苑門賊先有本軍屯武功關  
官軍入苑燒營幕而退走伯倫遇賊於苑伯倫死於  
陣前李椿爲賊所得

李元忠爲涇原兩州團練兵馬使上元元年死王事  
呂希倩爲左龍武大將軍德宗建中四年十月德宗  
避難於奉天朱泚之賊於城東西南三面偷城渾瑊  
率招召突將三百人分道連戰翌日辰時殺傷太甚  
力屈而退希倩死之贈大尉賜實封三百戶

高重傑爲將軍奉天之難泚賊攻城重傑力戰而死  
贈司空實封三百戶

酈定進爲左神策軍大將軍封陽山郡王定進時號  
爲勇將嘗征蜀有功憲宗元和五年討王承宗力戰  
陣敗馳歸馬倒賊識曰酈王也遂爲所害官軍爲之  
喪氣繇是贈兵部尚書疇布帛米有差

田布弘正子也元和十五年弘正移鎮冀布爲河陽  
節度長慶元年春移鎮涇原其秋鎮州軍亂弘正被  
殺朝廷以李愬疾不能軍無以扞廷湊之亂且以魏  
州田氏舊衆乃疾徵布使起復爲之節度仍遷檢較  
工部尚書詔布乘急傳之鎮布喪服居堊室去節旄  
導從之飾及入魏州處喪親事動皆得禮其祿俸月

入百萬一無所取又籍魏中家之舊產無巨細計錢  
十餘萬貫皆出之以頒軍士乃選其將史憲誠爲先  
鋒兵馬使以憲誠前出已麾下必能輸竭故盡以精  
銳付焉是時屢有中使齎急詔促其進兵至十月布  
遂以全軍三萬七千出抵賊於冀州南宮縣十一月  
進軍下賊二柵而魏人怯於格戰且以寒雪餽餉不  
給寢無鬪志憲誠因從而間之俄有詔分布軍與李  
光顏合勢東救深州其衆因大潰多爲憲誠所有布  
提兵八千以是月十日還魏州十一日會諸將復議  
興師而將卒益驕惰皆曰尚書能行河朔舊事則死

生行之若使戰皆不能也布自度其衆終不爲用歎曰功無成矣卽日密表陳軍情且稱遺表曰臣觀衆意終負國恩臣旣無功敢忘卽死伏願陛下速救光顏元翼不然者義士忠臣皆爲河朔屠害奉表號哭授其從事李石乃入啓父靈抽刃刺心曰上以謝君父下以示三軍言訖而絕時議以布才雖不足能以謝國家心志決烈得燕趙之古風

梁翟存初爲太祖諸軍都指揮使唐昭宗大順二年正月令丁會下黎陽龐師古與存西路下淇門衛縣自是常爲先鋒雄猛善戰士皆仗之爲氣大破朱瑾衆於墉下督戰晝夜不懈勒戰卒闕礮倚立修竿忽爲飛矢所中卒太祖深傷惜之

朱友寧太祖仲兄之子也領嶺南西道節度使天復三年四月率師破青州之博昌臨淄二邑殺戮五千餘衆暨北海焉六月丙子友寧復進逼青州及石樓與賊相遇決戰我師未振友寧馳騎督軍薨於陣牛裕爲桐廬鎮使乾元二年淮人寇桐墟殺畧吏民裕死之

郭言爲宿州刺史於時徐宿兵鋒日夕相接控扼偵邏以言爲首景福初時溥大舉來攻宿州言勇於野



戰喜逢大敵自引銳兵擊溥殺傷甚衆徐戎立退爲  
流矢所中一夕而卒

王彥章爲滑州節度使晉師陷鄆州代戴思遠爲北  
面招討使彥章渡汶以畧鄆境至遞坊鎮爲晉人所  
襲彥章退保中都兵敗爲晉將夏魯奇所擒晉王素  
聞其勇悍欲全活之令中使慰撫以誘其意彥章曰  
此是匹夫本朝擢居方面與皇帝十五年抗衡今日  
兵敗力窮死有嘗分皇帝縱垂矜宥何面目見人豈  
有爲臣爲將朝事梁而暮事晉乎得死爲幸遂遇害  
符道昭爲秦州節度使與康懷英等攻潞州以蚰蜒  
塹縛之飛鳥不度旣踰歲晉人援至王師大敗道昭  
爲晉軍所殺

後唐朱元禮始爲郡將梁太祖聞其名擢爲軍較從  
龐師古渡淮戰沒於淮南

安福遷與其兄福慶俱驍勇爲武皇親較景福末汴  
人急攻兗鄆朱瑄求援於武皇乃令福順等三將率  
騎軍以赴之福順與汴人戰沒福慶從史儼奔淮南  
朱瑄之敗福遷亦遇害

周德威爲幽州節度使天祐十五年下揚劉城莊宗  
大閱諸軍渡河趨汴徵德威進討師之將起威以爲

不利深入是夜鎮星犯文昌上將臨戰德威軍爲輜重所擾父子躍馬出之與賊數百騎血戰而死

史建塘爲相州刺史張文禮叛總北面行營兵馬攻趙州進攻鎮州營於西南隅日以輕騎逼門爲伏弩所中歸營而卒

李嗣昭權幽州軍府事會閻寶爲鎮州張處瑾所敗莊宗以嗣昭代之嗣昭爲流矢所中尋卒於師

孫重進爲大將性嚴重立法士卒畏憚天祐末張文禮據鎮州重進攻之戰沒於東垣渡

李存進爲魏博馬步都將會王師討張文禮於鎮州

討李嗣昭不利而歿以存進代之遂討鎮州王處球盡率其衆乘其無備奄至壘門存進聞之得部下數人出關驅賊於橋下俄而賊大至後軍不繼血戰而死

夏魯奇明宗時爲遂州節度使劉訓討荆南魯奇爲副招討使移鎮遂州時孟知祥董璋據有兩川魯奇僻居南鄙董璋之叛與知祥攻遂州旬日援路斷絕兵盡食乏勢知必屈乃自刎而卒  
安審通爲橫海軍節度觀察等使兼北面粉行營諸道馬軍都指揮使圍中山躬冒矢石以先士卒志平氛

稔爲飛矢所中卒

朱建豐爲趙州刺史王師討定州爲北面行營右廂  
步軍都指揮使張延朗以偏師先圍新樂卒於王事  
詔贈太傅

晉郭璘爲易州刺史契丹攻其郡璘率勵士衆同其  
艱苦虜不能克復以州兵擊賊數獲其利朝廷嘉之  
就加簡較太保虜主管謂左右吾不畏一天下乃爲  
北人所抑挫會杜重威降虜使通事耿崇美誘其民  
衆璘不能制爲崇美所殺

宋廷浩爲房州刺史汜水關巡簡使天福二年爲賊

軍所害

梁漢璋爲永清軍節度使天福八年詔領千騎戍冀  
州尋以杜重威北討詔以漢璋充北面軍馬都排陣  
使戍游口關與虜騎五千相逼於浮陽之北界苦戰  
竟日以衆寡不侔爲流矢所中沒於陣

王清爲奉國都虞侯谿州刺史少帝開運二年從杜  
重威北征解陽城之圍清苦戰爲步較之最加檢較  
司空及從杜重威收瀛州聞契丹大至重威率諸軍  
沿澧水而將保常山及至中渡橋虜已屯於北岸且  
扼歸路清知勢蹙請於重威曰軍去嘗山五里守株

於此營孤食盡將若之何請以步軍二千爲其前鋒奪橋開路公可率諸軍繼之期入嘗山必矣重威可也遣宋彥筠俱行清一擊獲其橋虜爲之小却重威猶豫不進密已貳於國矣彥筠尋退走清列陣北岸嚴戒部曲日暮酣戰不息虜以生軍繼至我無寸刃益之清與其下俱沒焉

吳巒爲復州防禦使開運中權知貝州虜復南牧擾我河塞巒以城無戍兵爲虜所陷遂死之

沈斌爲祁州刺史趙延壽知其無備與蕃賊急攻之仍呼謂斌曰沈使君我故人也擇禍莫若輕早以城降無自辱也斌登城呼曰侍中父子誤計陷於腥膻恐以犬羊之衆殘害父母之邦不自羞慙反有德色沈斌寧爲國家死必不效所爲也翌日城陷而卒

漢史萬山爲深州刺史乾祐三年春虜大入寇萬山城守有功虜退周太祖遣索方進率騎七百屯深州一日虜數十騎侵周東門萬山父子以虜不多乃率牙兵百餘人襲虜虜僞退十餘里而兵發萬山血戰急請救於方進方進勒兵不出萬山死之

禹洪遷爲夏州節度使會趙思綰據永興叛從郭從義進討之戰傷卒於陣

安文祐潞人也初孟方立據邢洛率兵攻上黨朝廷  
授文祐昭義節度使令討方立自蜀至澤州與方立  
戰敗沒於陣

李瓊為威州刺史行及鄭遇群盜攻郡瓊禦賊中流  
矢而卒

周蕭處仁為右金吾衛將軍世宗率兵渡淮以先鋒  
兵馬都監攻陷滁州為流矢所中而卒

自延遇為濠州刺史帥眾從侍衛使李重進攻圍濠  
州力戰為賊所傷數日而卒

冊府元龜

冊府元龜

淮南李嗣京奏閣

西極文翔鳳訂正

豫章黃國琦較釋

將帥部 八十七

招降

夫舞干之義載於虞書前禽之訓昭回義易自大道  
之喪在兵是用勝者類封豕之荐食敗者同困獸之  
猶聞是以肝腦塗地城郭為墟斯豈明王來蘇之意  
建賢節奏之舉乎其有授鉞於廟建牙作藩董茲戎

昭共行天罰乃能宣布德澤招來携貳結之以恩信  
格之以誠明先聲以奪其心大義以回其志使其奔  
走而獻款俯伏而求全斯亦善師不陣之謂矣至或  
孤壘危急士眾離析閔以窮困釋其怨疾俾夫洗滌  
以更始感激而效忠雖云仁者之志抑亦兵家之奇  
焉

漢項羽為楚懷王上將軍救趙秦將章邯軍韓原羽  
軍漳南相持未戰秦軍數却二世使人讓章邯邯恐  
使長史欣請事至咸陽留司馬門三日趙高不見欣  
恐還走至軍門曰事不可為者言不可復為陳餘亦

遺章邯書曰將軍何不還兵與諸侯為從言欲如六國時兵敵

奏南面稱孤孰與身伏斧質妻子為戮乎章邯狐疑

陰使侯始成使羽欲約軍侯姓始名成約未成羽使候將軍

軍章邯南與秦戰大破之羽悉引軍擊秦軍汙水上

大破之邯使使見羽欲約羽軍吏謀曰糧少欲聽其

約軍吏曰善羽乃與盟洹水南殷墟上已盟邯見羽

流涕為言趙高魏豹傳云項羽破秦軍降章邯

韓信擊破趙軍用廣武軍李左車策發使燕燕從風

而靡

後漢趙熹字伯陽南陽宛平人也更始即位武陽大

姓季氏擁城不下更始遣柱天將軍李寶降之不肯  
云聞宛之趙氏有孤孫熹信義著名願得降之更始  
乃徵熹熹年未二十既引見更始笑曰爾粟犢豈能  
負重致遠乎即除為郎中行偏將軍事使詣舞陰而  
季氏遂降熹因進入潁川擊諸不下者歷汝南界還  
宛更始大悅謂熹曰卿名家駒努力勉之武帝謂劉  
德為千里  
之駒故以以戰勞拜中郎將封勇功侯時江南未賓  
道路不通以熹守簡陽侯相熹不肯 兵單車馳之  
簡陽吏民不欲內熹熹乃告警呼城 示以國  
家威信其帥即開門面縛自歸

壁悉降荆

州牧秦熹才任理劇詔以為平林侯攻擊羣賊安集  
已降者縣邑平定

吳漢為大司馬率諸將及五較賊鬲縣五姓共逐守  
長據城而反諸將爭欲殺之漢不聽曰使鬲反者皆  
守長罪也敢輕冒道兵者斬乃移檄告郡使牧守長  
而使人謝城中五姓皆喜即相率降諸將乃服曰不  
戰而下城非眾所及也又更始尚書令謝躬留魏郡  
太守陳康守鄴大率諸將擊萊賊世祖因躬在外乃  
使漢襲其城漢先令辨士說陳康曰蓋聞上智不處  
危以倖僥中智能因危以為功下愚安於危以自亡

危亡之至在人所繇不可不察今東師敗亂四方雲擾公所聞也蕭王兵強士附河北歸命公所見也謝躬內背蕭王外失衆心公所見也公令據孤危之城待滅亡之禍義無所立節無所成不若閉門內軍轉禍爲福免下愚之敗收中智之功此計之上者也康然之於是收劉慶及躬妻子開門內漢等

馮異爲孟津將軍統內郡河內二郡軍河上與河內太守寇恂合勢以拒更始將朱鮪等異乃遺李軼書曰愚聞明鏡所以照形往事所以知今昔微子去殷而入周項伯畔楚而歸漢周勃迎代王而黜少帝霍

光尊孝宣而廢昌邑彼皆畏天知命觀存亡之符見廢興之事故能成功於一時垂業於萬世也苟令長安尚可扶助延期數月疏不問親遠不踰近季文豈能居一隅哉今長安壞亂赤眉臨郊王侯構難大臣乖離綱紀已絕四方分散異姓並起蕭王跋涉霜雪經營河北方令英俊雲集百姓風靡雖邠岐慕周不足以踰季文誠能覺悟成敗承定大計論功古人轉禍爲福在此時矣如猛將張驅嚴兵圍城雖有悔恨亦無及已初軼與光武首結謀約加相親愛及更始立反陷戮伯升雖知長安已危欲降又不自安乃報



異書曰軼本與蕭王首謀造漢結死生之約同勞苦之計今軼守雒陽將軍鎮孟津俱據機軸千載一會思誠斷金唯深達蕭王願進愚策以佐國安人軼自通書之後不復與異爭鋒故異因此得北攻天井關拔上黨兩城又南下河南成臯巴東十三縣及諸屯聚皆平之降者十餘萬

岑彭為廷尉行大將軍事與大司馬吳漢等圍雒陽吏目更始將朱鮪堅不下光武以彭嘗為鮪較尉令往說鮪鮪在城上彭在城下相勞苦如平生鮪因曰大司徒被害鮪預其謀

大司徒光武兄伯升為更始所殺

又諫更始

無遣蕭王北伐自知罪深彭還具言於帝帝曰夫建大事者不念小怨鮪今若降官爵保况誅罰乎彭復告鮪鮪從城上下索曰必信可乘此上彭趣索欲上鮪見其誠即許降後五日鮪將輕騎詣彭乃面縛與彭俱詣河陽帝即解其縛與見之復令彭夜送鮪歸城明旦悉其眾出降彭後為征南大將軍伐蜀以夾州穀少水險難漕運留威虜將軍馮駿軍江州都督曰鴻軍夷陵領軍李玄軍夷道自引兵還屯津鄉當荆州要會喻告諸蠻夷降者奏封其君長初彭與交趾牧鄧騭厚善與騭書陳國家威德又遣偏將軍屈

充移檄江南頒行詔命於是讓與江夏太守侯登武陵太守王堂長沙相韓福桂陽太守張隆零陵太守田歆蒼梧太守杜穆交趾太守錫光等相率遣使貢獻悉封爲列侯或遣子將兵助彭征伐於是江南之珍始流通焉又自率臧宮劉歆長驅入江關令軍中無得虜掠所過百姓皆奉牛酒迎勞彭見諸老爲言大漢哀愍巴蜀久見虜役故興師遠伐以討有罪爲人除害讓不受其牛酒百姓大喜悅爭開門降馬援爲隴西太守遣羌豪楊封譬說塞外羌皆來和親又武都氐人背公孫述來降者援皆上復其侯王

君長賜印綬光武喜悉從之

來歙爲中郎將建武七年帝使歙至沂歙以書招隗  
賈大將軍王遵遵乃與家屬東詣京師

王遵隗囂將也後去囂詣京師拜大中大夫封尚義  
侯光武率諸將上隴使遵持節監大司馬吳漢留營  
於長安時囂將牛邯軍瓦亭遵知囂必敗滅而與牛  
邯舊故知其有歸義意以書喻之曰遵與隗王歆盟  
爲漢自經歷虎口踐履死地已十數矣于時周雒以  
西同雒謂東都也無所統壹故爲王策欲東收關中北取上  
郡進以奉天人之用退以懲外夷之亂數年之間與

聖漢復存當挈河隴奏舊都以君大朝生民以來臣

人之勢未有便於此時者也而王之將吏郡居亢處

之徒亢處言所人人抵掌說文抵掌擊也戰國策云蘇秦與李兌抵掌而談也

欲為不善之計遵與孺卿日夜所爭害幾及身者豈

一事哉前計抑絕後策不從所以吟嘯扼腕垂涕登

車扼持也史記云天下之幸蒙封拜得延論議遵為

大人在議論之職身及西州之事未嘗敢忘孺卿之言今車

駕大眾已在道路吳耿驍將雲集四境而孺卿以奔

離之卒拒要扼當軍衝視其形勢何如哉夫智者觀

阨思變賢者泥而不滓在泥滓之中是以功名終申

策畫復得故夷吾束縛而相齊鮑叔成飲桓公

穎叔曰姑為寡人祝乎穎叔奉酒而起祝曰吾君無

忘乎昔也使管子無忘束縛從魯也使甯戚無忘其

飲牛于黔布杖劍以歸漢黔布為楚淮南王高祖使

車下也隨何說布乃杖劍歸王也

去愚就義功名并著今孺卿當成敗之際遇嚴兵之

鋒可為怖慄宜斷之心胷參之有識耶得書沉吟十

數日乃謝七眾歸命雒陽拜為大中大夫於是囂大

將十三人屬縣十六眾十餘萬皆降

應奏為武陵太守奉詔誘叛蠻降之

祝良為九真太守與交阯刺史張喬慰誘日南叛蠻降

之嶺外乃平

曹宗為燉煌太守時北匈奴與諸國共為邊寇宗患其暴害遣行長史索班將千餘人屯伊吾以招撫之於是車師前王及鄯善王來降

龐參為護羌校尉時燒當羌種號多還斷隴道參以恩信招誘之號多等率眾七千人詣參降

馮緄為度遼將軍詔緄招降叛虜於是右賢王部仰鞬等萬三千口詣緄降

夏方為交趾刺史時南蠻夷攻燒城邑方招誘降之馮續為隴西太守鮮卑寇邊以續為遼東太守曉諭降集虜皆彌散又遷車騎將軍討長沙零陵蠻賊軍

至長沙賊悉詣營道乞降

營道今道州縣也

進擊武陵蠻夷

斬首四千餘級受降千餘萬人荆州平定

劉表鎮荆州張濟引兵至荆州賈詡隨之歸表襄陽城守不受濟因攻之為流矢所中濟從子繡收眾而進表自責以為已無賓禮遣使招繡繡遂屯襄陽為表比藩

劉虞字伯安初為幽州刺史恩信流著戎狄附之公孫瓚討羗有功進屯屬國與胡相擊五六年兵力居等鈔畧青徐幽冀四州被其害瓚不能禦朝議以虞既有德義若使鎮撫可不勞眾而定乃以虞為幽州

收虞到遣使至胡中告以利害責使送張純首丘力居等聞虞至喜各遣譯自歸瓚害虞有功乃陰使人邀殺胡使胡知其情間行詣虞虞上罷諸屯兵但留瓚將步騎萬人屯右北平純乃棄妻子逃入鮮卑爲其客王政所殺送首詣虞封政爲列侯以功卽拜太封襄賁侯

呂布爲徐州牧在下邳東海蕭建爲琅邪相治莒保城自守不與布通與建書曰天下舉兵本以誅董卓耳布殺卓來詣關東欲求兵西迎大駕光復雒京諸將自還相攻莫肯念國布五原人也去徐州五千餘

里乃在天西北角今不來共爭天東南之地莒與不邳相去不遠宜當共通君如自遂以爲郡郡作帝縣縣自王也昔樂毅攻齊呼吸下齊七十餘城唯莒卽墨二城不下所以然者中有田單故也布雖非樂毅君亦非田單可取布書與智者詳共議之建得書卽遣主簿齎牋上禮貢良馬五匹  
魏鍾繇漢末爲尚書僕射時關中諸將馬騰韓遂等各擁強兵相與爭太祖方有事山東以關右爲憂乃表繇以侍中守司隸較尉持節都督關中諸軍委之以後事特使不拘科制至長安移書騰遂等爲陳禍

福騰遂遣子入侍  
董招漢末爲河南尹時張楊爲其將楊醜所殺楊長  
史薛弘河內太守繆尚城守待袁紹救太祖令招單  
身入城告喻弘尚等即日舉衆降以昭爲冀州牧時  
袁紹遣將領顏良攻東郡又徙昭爲魏郡太守從討  
良良死後進圍鄴城袁紹同族春卿爲魏郡太守在  
城中其父元長在楊州太祖遣人迎之昭書與春卿  
曰蓋聞孝者不肯親以要利仁者不忘君以徇私志  
士不探亂以徼幸智者不詭道以自危足下大君昔  
避內難南游百越非疏骨肉樂彼吳會智者深識獨

或宜然曹公愍其守志清恪離羣寡儔故特遣使江  
東或迎或送今將至矣就令足下處偏平之地依德  
義之主居有太山之固身爲喬松之偶以義言之猶  
宜背彼向此舍民趣父也且邾儀父始與隱公盟魯  
人喜之而不書爵然則王所未命爵尊不成春秋之  
義也况足下今日之所託者乃危亂之國所受者乃  
矯誣之命乎苟不逞之與羣而厥父之不恤不可以  
言孝忘祖宗所居之本朝安非正之奸職難可以言  
忠孝忠並替難以言智又足下昔者爲曹公所禮辟  
夫戚族人而疎所生內所寓而外王室懷邪祿而叛

知已遠福祿而近危亡棄明義而收太耻不亦可惜  
耶若能翻然易節奉帝養父委身曹公忠孝不墜榮  
名彰矣宜深留計早決良圖鄴既定以昭爲建義大  
夫夫徐晃爲偏將軍太祖圍鄴破邯鄲易陽令韓範僞以  
城降而拒守太祖遣晃攻之晃至飛矢城中爲陳成  
敗範梅晃輒降之旣而言於太祖曰二袁未破諸城  
未下者傾耳而聽今日滅易陽明日皆以死守恐河  
北無定時也願公降易陽以示諸城則莫不望風太  
祖善之又爲廣野將軍後征張魯別遣晃討攻犢犍  
夷諸山氏皆降之遷平寇將軍

張遼遷裨將軍太祖遣定魯國諸縣與夏侯淵圍昌  
豨於東海數月糧盡議引軍還遼謂淵曰數日已來  
每行諸圍豨輒屬目視遼又其射矢更稀此必豨計  
猶豫故不力戰遼欲挑與語儻可誘也乃使謂豨曰  
公有命使遼傳之豨果下與遼語遼爲說太祖神武  
方以德懷四方先附者受大賞豨乃許降遼遂單身  
上三公山入豨家拜其妻豨歡喜隨詣太祖太祖遣  
豨還責遼曰此非大將法也遼謝曰以明公威信著  
於四海遼奉聖旨豨必不敢害故也

吳全琮為安東太守明賞罰招誘降附數年中得萬餘人

呂蒙為偏將軍領尋陽令魏使廬江謝奇為蕪春典農屯皖田鄉數為邊寇蒙使人誘之不從則伺隙襲擊奇遂縮退其部伍孫子才宋蒙等皆携負老弱詣蒙降又劉備令關羽鎮守專有荆土大帝令蒙西取長沙零桂三郡蒙移書二郡望風歸服又關羽討樊蒙浮江襲其空虛蜀將軍士仁在公安拒守蒙令虞翻說之翻至城門謂守者曰吾欲與汝將軍語仁不肯相見乃為書曰明者防禍於未萌知者圖患於將來

來知得知失可與為人知存知亡足別吉凶大軍之行斥候不及施烽火不及舉此非天命必有內應將軍不先見時時至又不應之獨守紫帶之城而不降死戰則毀宗滅祀為天下譏笑呂虎威欲到南郡斷絕陸道生路一塞案其地形將軍為在箕舌上耳奔走不得免降則失義竊為將軍不安幸熟思焉仁得書流涕而降翻謂蒙曰此誦兵也當時仁行留兵備城遂將仁至南郡南郡太守麋芳城守蒙以仁示之遂降吳錄云初南郡城中失火頗焚燒軍器羽以責芳芳內畏懼吳聞而誘之芳潛相和及蒙攻之乃以牛酒出降焉蒙入據城盡得羽及將士家屬皆撫慰令



軍中不得干歷人家有所求取蒙麾下士是汝南人取民家一笠以覆官鎧官鎧雖公蒙猶以爲犯軍令不可以鄉里故而廢法遂垂涕斬之於是軍中震慄道不拾遺蒙旦暮使親近存恤耆老問所不足疾病者給醫藥饑寒者賜衣糧羽府藏財寶皆封閉以待大帝至羽還在道路數使人與蒙相聞蒙輒厚遇其使周游城中家家致問或手書示信羽人還私相參訊咸知家門無恙見待過於平時故羽吏士無鬪心會大帝尋至羽自知孤窮乃走麥城西至漳鄉衆皆委羽而降大帝使朱然潘璋斷其徑路卽父子俱獲

荆州遂平

陸胤爲交州刺史安南較尉時交阯九真夷賊攻沒城邑交阯騷動胤入南界喻以恩信務從招納高涼渠帥黃吳等支黨三千餘皆出降引軍而南重宣至城遣以財幣賊師百餘人民五萬餘家浮幽不羈莫不稽顙交域清泰就加安南將軍復討蒼梧桐建陵賊破之前後出兵八千餘人以充軍用諸葛恪爲左輔都尉大帝令恪守節度掌軍糧穀非其好也恪以丹陽山險民多果勁雖前發兵徒得外縣平民而已其餘浮遠其能擒盡屢自求乞爲官出

之三年可得甲士四萬衆議咸以丹陽地勢險阻與  
吳郡會稽新都鄱陽四郡鄰接周旋數千里山谷萬  
重其幽邃民人未嘗入城邑對長吏皆伏兵野逸白  
首於林莽逋亡宿惡咸共逃竄山出銅鐵自鑄甲兵  
俗好武習戰高尚氣力其升山赴險抵突叢棘若魚  
之走淵援狃之騰木也時觀間隙出爲寇盜每致兵  
征伐尋其窟藏其戰勝則蠶至敗則烏窠自前世以  
來不能羈也皆以爲難恪父瑾聞之亦以事終不逮  
恪盛陳其必捷大帝拜恪撫越將軍領丹陽太守授  
檠戟武騎三百拜畢命恪備威儀作鼓吹導引歸家

時年三十二恪到府乃移書四郡屬城長吏令保其  
疆界明立部位其從化平民悉令屯居乃分內諸將  
羅兵南阻但繕藩籬不與交鋒候其穀稼將熟輒縱  
兵芟刈使無遺種舊穀旣盡雜田不收平民屯居畧  
無所入於是山民饑窮漸出降首恪乃復勅下曰山  
民去惡從化皆當撫慰徙出外縣不得嫌疑有所執  
拘曰陽長胡伉得降民周遺舊民惡困迫暫出內圖  
叛逆伉縛送言府恪以伉違教遂斬以徇以狀表上  
氏聞伉坐執人被戮知官惟欲出之而已於是老幼  
相携而出歲期人數皆如本規恪自領萬人餘分給

諸將

蜀諸葛亮為丞相錄尚書事建興三年亮南征歸至漢陽縣降人李鴻來詣亮亮見鴻時蔣琬與費詩在坐鴻曰聞過孟達許適見王冲從南來言往者達之去就明公切齒欲誅達妻子恐先生不聽耳達曰諸葛亮見頌有本末終不爾也盡不信冲言委仰明公無復已已亮謂琬詩曰還都當有書與子度相聞詩進曰孟達小子昔事振威不忠後又背叛先主反覆之人何足與書邪亮默然不答亮欲誘達以為外援竟與達書曰往年南征歲未及還適與李鴻會於漢

陽承知消息慨然永嘆以存足下平素之志豈徒空託名榮貴為乖離乎嗚呼孟子斯實劉封侵陵足下以傷先主待士之義又鴻道王冲造作虛語云足下量度吾心不受冲說尋表明之言追平生之好依依東望故遣有書達得亮書數相交通辭欲叛魏魏遣司馬宣王征之即斬滅達亮以達無欺誠之心故不救助也

晉祖逖為豫州刺史樊雅據醮郡反逖使桓宣說之雅與宣置酒結友遣子隨宣詣逖少白雅便自詣逖逖遣雅還撫其眾僉謂前數罵辱逖懼罪不敢降雅

閉城自守逃往攻之復遣宣入說雅雅卽斬巽者遂  
出降

陶侃爲龍驤將軍征杜弢弢將王貢精卒三千出武  
陵江誘五谿夷以舟師斷官運徑向武昌侃使鄭攀  
及伏波將軍陶延夜趨巴陵潛師掩其不備大破之  
斬千餘級降萬餘口貢遁還湘城賊中離阻杜弢遂  
疑張奕而殺之衆情益懼降者滋多王貢復挑戰侃  
暹謂之曰杜弢爲益州刺史盜用庫錢父死不奔喪  
卿本隹人何爲隨之也天下寧有白頭賊乎貢初橫  
脚馬上侃言訖貢歛容下脚辭色甚順侃知其可動

復令諭之截髮爲信貢遂來降而弢敗走進尅長沙  
獲其將毛寶高寶梁堪而還又爲廣州刺史先是廣州  
人迎長沙人王機爲刺史機復遣使詣王敦乞爲交  
州刺史敦從之會杜弘據臨賀因機乞降勸弘取廣  
州弘遂與溫邵及交州秀才劉沉俱謀反侃追擊破  
之執劉沉又遣部將討機斬之諸將皆請乘勝擊溫  
邵侃笑曰吾威名已著何事遣兵但以函紙自足耳  
於是下書諭之邵懼而走追獲於始興

王導爲都督諸軍事蘇峻之亂路永康術賈寧等皆  
峻心腹聞祖約奔敗懼事不立逃說峻誅大臣峻旣

不納永等慮必敗陰結于導導使參軍袁耽潛說路永使歸順

南齊始興王鑑鎮益州劫帥韓武方嘗聚黨千餘人

斷流爲暴郡縣不能禁行旅斷絕鑑行至上明武方

乃出降長史虞棕

藏宗切

等咸請殺之鑑曰武方爲暴

積年所不能制今降而被殺失信且無以勸善於是

啓臺果被宥自是巴西蠻夷凶惡皆望風降附

梁蕭景高祖初爲寧朔將軍行南兖州事天下未定

沔北僭楚各據塢壁景示以威信渠帥相率百縛請

罪旬日境內皆平

衡山侯恭監南徐州事時衡州刺史武會超在州子

侄縱暴州人朱朗聚黨反武帝以恭爲刺史時朗已

圍始興恭至緩服徇賊示以恩信群賊伏其勇是夜

退三舍以避兵軍吏請追恭曰賊以政苛致叛非有

陳吳之心緩之則自潰急之則併力諸君置之明日

朗遣使請降恭杖節受之一無所問

後魏江陽王繼爲平北將軍鎮攝舊都高車酋帥樹

擁部民反叛詔繼都督北討諸軍事自懷朔已東悉

稟繼節度繼表高車頑黨不識威憲輕相合集背役

逃歸計其竟戾事合窮極若悉追戮恐遂擾亂請遣

使鎮別推驗斬誓首一人有餘加以慰喻若悔悟從  
役者卽令赴軍詔從之於是叛徒徃徃歸順孝文善  
之顧謂侍臣曰江陽足大任也

源子恭爲尚書主客郎中攝南主客事時河州羗却  
鐵忽反殺害長吏詔子恭持節爲行臺率諸將討之  
子恭嚴勒州郡及諸軍不得犯民一物輕與賊戰然  
後示以恩威兩旬間悉皆降款朝廷嘉之

韋琮孝文初蠻首桓誕歸款朝廷思安邊之畧以誕  
爲東荊州刺史令琮爲使與誕招慰諸蠻琮自懸瓠  
西入三百餘里至桐栢山窮臨淮源宣揚恩澤莫不

降附

才遵爲龍驤將軍雒州刺史遵招誘有方梁新化太  
守杜性新化令杜龍振平陽令杜臺定等率戶三千  
據地內附

竇瑾爲殿中都官尚書從征蓋吳先駟慰喻自平巴  
西氏羗酋領降下數千家

慕容白曜爲左僕射都督諸軍事征南大將軍攻宋  
斗城宋將房崇吉夜遁獲崇吉母妻待之以禮崇吉  
與從弟法壽盜宋繫陽城以贖母妻白曜自瑕丘遣  
將軍長孫觀等率騎入自馬耳關赴之觀至繫陽諸

懸悉平又宋幽州刺史劉休賓鎮梁鄒及白曜軍至  
斗城遣人說之令降休賓不從宋龍驤將軍崔靈延  
行渤海郡房靈建等數十家皆入梁鄒同舉休賓爲  
征虜守荒州會宋遣使授休賓輔國將軍兗州刺史  
休賓妻崔邪利女也生一男字文羣崔氏先歸寧在  
魯郡邪利之降也文羣母子送與俱入國至是白曜  
表請崔與文羣旣至白曜以報休賓又於北海報其  
弟劉延和妻子送至梁鄒巡視城下休賓答曰白曜  
許歷城降當歸順密遣主簿尹文達向歷城觀魏國  
形勢文達詣白曜昨言聞主入境故來祗候利謂白

曜曰劉休賓父子兄弟累郡連州今若識運知機束手歸化不審明王如何賞叙白曜曰休賓仕南爵寵如此今若不勞兵甲望風自降者非直處鄉富貴兼還其婦兒休賓縱令不畏攻圍豈不憐其妻子也今在斗城鄉自往見文達乃至斗城見妻子文羣攀援文達哭泣號咷以瓜髮爲信文達回還復經白曜誓約而去白曜曰卿是休賓耳目腹心親見其妻子又知我衆旅少多善共景識自求多福文達還見休賓出其妻兒爪髮兼宣白曜所言及國軍形勢謂休賓曰斗城已敗歷城非朝則夕公可早圖之休賓撫瓜

髮泣涕曰妻子幽隔誰不愍乎吾荷南朝厚恩受寄  
邊任今顧妻子而降於臣節不足也而密與其兄子  
聞慰議為降計聞慰曰此故當文達誑計耳年當抄  
掠豈有多軍也但可撫強兵勒肅衛方城使嶮何為  
便生憂怯示人以弱也休賓又謂文達曰卿勿憚危  
更為吾作一返音番善觀形勢於是遣文達偷道而出  
令與白曜為期尅日許送降文白曜嘆曰非直休賓  
父子荷榮城內賢豪亦隨人補授卿便即為梁鄒城  
主以酒灌地啓告曰山河若負休賓使我三軍沒覆  
初白曜之表取休賓妻子也獻文以道固既叛詔授

休賓持節平南將軍冀州刺史原公至是付文達詔  
策文達還謂休賓曰白曜信誓如此公可早為決計  
恐攻逼之後降悔無繇休賓於是告兄子聞慰曰事  
勢可知汝早作降書聞慰沈疑固執不作遂差本契  
白曜尋遣著作佐郎赤虎夜至梁鄒南門下告城上  
人曰汝語劉休賓何遣文達頻遣僕射許送降文歸  
誠大化何得違期不來於是門人唱告城內悉知遂  
相維持欲降不得皆劉休賓父子欲以我城內易榮  
位也尋被攻逼經冬至春歷城降白曜遣崔道固子  
景業與文曩至城下休賓知道固降乃出請命白曜



送休賓及宿有名望者十餘人俱入代邸為客

尉元為鎮南大將軍援徐州宋東徐州刺史張鷟據團城徐州刺史王玄載守下邳駟掠近民保險自固元遣慰喻張鷟及青州刺史沈文秀等皆遣使通誠王整桓欣相與歸命

呂羅漢為羽林中郎上邽休官呂豐屠各王飛鹿等八千餘家據險為逆詔羅漢與司馬楚之駕前招慰降者九千餘戶比至盱眙頻被賊軍擒其將顧儼李觀之等以功遷羽林收郎幢將加建威將軍

楊椿孝文時為寧朔將軍梁州刺史初武與王楊集

為楊靈琬所破降於齊至是率賊萬餘自漢中而北規復舊土椿領步騎五千出嶺下辯貽書集始開以利害集始執書對使者曰楊使君此書除我心腹之疾遂領其部曲千餘人來降後孝昌中爾朱榮既據并肆與汾州胡逆表加椿征虜將軍都督慰勞汾胡汾胡與椿北州服其聲望所在降下  
盧景為鎮東將軍徐州刺史宣武永平四年夏景表曰梁琅邪郡民王萬壽等款城內納潛來詣臣云胸山戍今將交換有可圖之機臣卽以旌賞遣其還入至三月二十四日夜萬壽等獎率同盟攻掩胸城斬

梁輔國將軍琅邪東莞二郡太守帶胸山戍主劉昕  
 并將士四十餘人傳首至州臣即遣兼郟城副張天  
 惠率驍勇二百徑往赴之琅邪諸戍駱驛繼援而梁  
 郁州已遣二將軍以拒天惠天惠與萬壽等內外齊  
 擊俘斬數百便即據城詔景曰彭宋地接邊疆勢連  
 淮海威禦之術功不在易响山險塞寇之要防水陸  
 交湊楊郁路衝畜聚凶從處留邊鄙青光齊充每離  
 其患卿妙筭既敷克城殄衆展疆辟土何善如之庸  
 勲之典朕用嘉止故遣左右直長潤遵業具宣往懷  
 北齊薛循義為安北將軍蜀賊陳雙熾等聚汾曲詔

循義為大都督與行臺長孫稚共討之循義以雙熾  
 是其鄉人遂送鄉詣壘下曉以利害熾等還降拜循  
 義龍門鎮將循義又為關右行臺自龍門濟河西魏  
 北華州刺史薛崇禮氏楊氏壁循義以書招之崇禮  
 率萬餘人降復拜晉州刺史在州擒西魏王北平太  
 守段榮招降胡酋胡垂黎等部落數千人口表置二  
 原郡以安處之

趙彥深為安國縣伯從文襄征潁川時引水灌城城  
 雉將沒西魏將王思政猶欲死戰文襄令彥深單身  
 入城告喻即日降之便手牽思政上城

文襄謂彥深曰吾昨夜夢

招降

遇一群豕吾射盡獲之獨一大豕不可得卿言當為  
吾取須臾獲豕而進主是文襄笑曰夢驗矣即解忌  
政佩刀與彥深曰使卿當獲此利

後周於謹初仕後魏為元纂鎧甲曹從事追討茹茹  
為賊所圍乃逃入寨時魏末喪亂羣盜蜂起謹兼解  
諸國語乃單身入賊中示以恩信於是西部鐵勒酋  
長也列河等三萬餘戶並款附魏帝嘉之除積射將  
軍

權景宣為驃騎大將軍安州刺史燕公于景征江陵  
景宣破梁司空陸法和司馬羊亮於潁水又遣別帥  
舟艦益張旗幟臨江欲度以懼梁人梁

攻

將王琳在湘州景宣遺之書諭以禍福琳遂遣長史  
席整因景宣請舉城款附

史寧為征東將軍賀拔勝為荊州刺史寧以本官為  
勝軍司率步騎一千隨勝之部值荆蠻騷動三鴉路  
絕寧先駟平之因撫慰蠻左翕然降附隨稅得馬一  
千五百匹供軍

王悅為大行臺尚書從達奚武征梁漢軍出武令悅  
說其城主楊賢悅乃遺之書賢於是遂降又白武云  
白馬衝要是必爭之地今城守寡弱易可圖也若蜀  
兵更至攻之實難武然之即令悅輕騎徑趨白馬悅

示其禍福將浮悟悅遂以城降

梁禦為鎮西將軍太祖既平秦隴西方引兵東下雍州刺史賈顯持兩端通使於齊太祖以禦為大都督雍州刺史領前軍先行既與顯相見因說之曰魏室陵遲天下鼎沸高歡志在兇逆島夷非遠字文夏州英姿不世筭畧無方方欲扶危定難興復京維公不於此時立功效乃懷猶預恐禍不旋踵矣顯即出迎太祖禦遂入鎮雍州

齊王憲從武帝伐齊為前鋒進克鄴城齊任城王湝廣寧王孝珩據信都有眾數萬武帝復詔憲討之仍令齊王手書與湝曰朝廷遇締甚厚諸王無恙叔若釋甲則無不優渥不納乃大開賞募多金帛沙門勇為戰士者亦數千人憲軍過趙州湝令間諜一人覘視形勢候騎執以白憲乃齊集之舊將徧示二人又謂之曰吾所爭者大不在汝等令放汝還可即克我使乃與一書書具傳其末云交兵命使古今通典不俟終日所望知幾也俄而湝領軍尉相願以眾降相願潛之腹心也眾駭之因破之擒湝

隋李雄字昆盧初仕後周為上儀同從行軍總管韋孝寬畧定淮南雄以輕騎數百至破口說下十餘城

拜濠州刺史  
元諧爲上大將軍總兵討吐谷渾俘斬萬餘於是移書諭以禍福其名王十七人公侯十三人各率其所部來降

劉權大業中爲南海太守行至鄱陽會羣盜起不得進詔令權召募討之權率兵與賊一遇不與戰先乘單舸詣賊營說以利害而羣盜感悅一時降淮陽帝聞而嘉之  
唐河間王孝恭爲南山道招慰大使自金州出於巴蜀招撫以禮降附者三十餘州遷襄陽道招慰大使

行臺尚書左僕射荆襄雖定嶺表尚未悉平孝恭分遣使人撫慰嶺南四十餘州皆來款附  
薛萬淑爲右嶺軍鎮黃龍時突厥之亂也萬淑遣契丹渠帥貪沒折諷諭北狄東國威靈奚霫室韋等十餘部皆來降附太宗下書褒美  
劉師立爲岐州都督上請書討吐谷渾書奏未報便遣使問其部落諭以利害多有降附列其地爲開橋二州又有黨項首領拓拔赤解感悟率其種落內屬太宗嘉之拜赤解爲西戎州都督  
侯君集爲交河道行軍總管擊高昌麴智盛頓軍城

下諭以禍福智盛致書於君集曰有罪於天子者先  
王旣咎深譴積身已喪亡智盛襲位未有愆闕所冀  
尚書赦之君集報曰若能悔禍宜束手軍門智盛猶  
不出後計無所出遂開門出降  
薛萬備爲阿史那杜爾行軍長史杜爾破龜茲于闐  
王伏闕信大懼使其子以駝馬三百疋餽軍及將旅  
師萬備謂社爾曰今者旣破龜茲國威已振請因此  
機願以輕騎羈取于闐之王社爾乃遣萬備率五十  
騎抵于闐之國萬備陳國威靈勸其入見天子伏闕  
信於是隨萬備來朝

李勉爲汴宋滑豪河陽等道節度使德宗建中三年  
淄青李納叛使勉誘說於納許降乃遣其叛官簡較  
戶部郎中房說以其母弟經男成務朝於京師  
嗣曹王皋爲江南西道觀察使時李希烈反皋乃遣  
伊慎王鐔將兵進圍安州州城阻湏水爲固攻之累  
日不下希烈遣其甥劉戒虛將步騎八千來援皋乃  
遣李伯潛分兵迎擊之戰於應山獲戒虛及大將二  
人禪將二十人斬首千餘級戒虛等皆面縛示於城  
下皋使人說之賊曰得大將及賓介二人爲信當  
以城降皋乃遣王鐔馬燧繩城而入城中皆大呼乃

出降希烈又遣將將兵援隨州舉又令伊慎邀擊於厲鄉大破之乃復平靜百鳳等關希烈甚畏之

伊慎建中未爲安州刺史時李希烈死李惠登爲賊守隨州慎飛書招諭惠登隨以城降因密奏惠登可用詔授隨州刺史

馬燧爲奉誠軍及晉絳慈隰節度并管內諸軍行營副元帥與侍中渾瑊及鎮國軍節度駱元光等合軍河中李懷光次於長春宮懷光將徐庭光以兵六千守宮城禦備甚嚴燧度長春不下則懷光自固攻之曠日持久所傷必甚乃挺身至城下呼庭光素憚燧

威名則拜於城上燧度庭光心已屈乃徐謂之曰我來自朝廷可西面受命庭光復拜燧乃喻之曰公等皆朔方將士祿山已來首建大勳四十餘年功伐最高奈何棄祖父之勲力背君上爲滅族之計邪從吾非止免禍富貴可圖也賊徒皆不對燧又曰爾以吾言不誠今相去不遠數步爾當射我心被襟示之庭光感泣俯伏軍士亦泣下先一日賊焦離堡守將尉珪以兵三千因堡降燧庭光東道既絕乃率衆出降燧以數騎徑入城處之不疑莫不畏服衆大呼曰吾輩復得爲王人矣渾瑊繇是服燧私謂參佐曰予嘗

謂馬公用兵與予不相遠但經怪累敗田悅今觀其  
行兵料敵吾不迫遠矣  
范希朝爲朔方靈鹽節度使突厥別部有沙陀者北  
方推其勇勁希朝誘致之自其州舉族來朝歸衆且  
萬人其後以之討賊所至有功

李光顏討淮西敗吳元濟之衆三萬於鄆城其將張  
伯良奔於蔡州殺其賊十二三獲馬千匹噐甲三萬  
聯皆畫雷公符仍書云速破城北軍尋而鄆城守將  
鄧懷金請以城降光顏許之而收鄆城初鄧懷金以  
官軍圍青陵城絕其歸路懷金懼謀於鄆城令董昌

齡昌齡母素誠昌齡因此勸懷光歸欵於光顏且曰  
城中之人父母妻子皆質於蔡州如不屈而降則家  
盡屠矣請來降城我則舉烽求救救兵將至官軍逆  
擊之必敗此時當以城降光顏從之賊果敗走於是  
昌齡執印帥吏列於門外懷金諸將素衣倒戈列於  
門內光顏受降乃入羅城其城自壞五十餘步  
李朔爲唐鄧節度使討淮西吳少誠子壻董重質性  
勇悍識軍機善用兵及元濟拒命重質又爲謀主領  
大軍當王師連歲不拔皆重質之謀也元和十二年  
宰相裴度督兵至鄆城元濟懼乃悉發左右及守城



之卒委重質而拒度愬乘虛入蔡旣擒元濟重質之家在蔡愬乃安邱之仍使其子持書禮以招重質見其子知城已陷及元濟囚窘之狀乃慨然以單騎歸愬白衣叩伏愬揖登堦以賓禮與之食憲宗欲殺之愬奏許以不死而來降請免之且乞於本軍駟使嚴綬爲荆南節度有叙州蠻酋張伯請殺長史據辰錦諸州連九洞以自固詔綬出兵討之綬遣部將李志烈齎書曉諭盡招降之

後唐李嚴爲客省使隨郭崇韜征蜀爲三川招撫使嚴與先鋒使唐延孝將兵五千先驅閣道或馳以詞說或威以兵鋒大軍未及所在降下延孝在漢州王衍與書曰可請司空先來餘卽舉城納款衆咸以討蜀之謀始於嚴衍以耳言將誘而殺之欲不令往嚴聞之喜卽馳騎入益州衍見嚴於母前以妻母爲託卽日引蜀使歐陽彬迎謁魏王繼岌

晉劉處讓爲左監門衛上將軍充宣徽南院使天福二年范延光據城反高祖命宣武軍節度使楊光遠領兵討之處讓詔與光遠同參議軍政四年冬范延光將謀納降尚或遲留處讓首入其城以禍福諭之延光乃降

周曹英爲侍衛親軍馬步軍指揮使兗州行營廣順二年正月上言十八日至任城喚得縣令胡延禧分付勅榜招安百姓其山寨民尋時下山歸業見更令招安次又上言按問得降人及兗州副都指揮使康海超來投俱說賊城人心離散慮慕容彥招逃竄已牒鄰道防備掩殺其康海超且留於城下說誘賊黨俟三五日遣勅京師

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

將帥部

受降

夫叛而伐之服而舍之軍之善政也故舞干而格因壘而降義著於招攜功成於無戰皆聖王之令範焉乃有董厥戎政式遏亂畧恩信攸及威聲載道強敵懾畏群伍離析繇是開璧送款負鎖歸仁狙獷咸懷

反側以定甲兵載戢而芒刃不頓連薨案堵而閭井以完至乃鄣塞寧謐夷羗綏附克固吾圍以屏諸華此真得良帥之風而達經武之要者也

後漢齊武王績字伯升更始卽以爲大司徒時平林

後部攻新野不能下新野宰登城言曰王莽改令長爲宰東觀記

曰其宰潘臨也得司徒劉公一信願先下及伯升軍至卽開

城門降

馮異爲陽夏侯光武以赤眉延岑暴亂三輔郡縣大

姓各擁兵衆遣異討之異所至皆布威信弘農郡盜

稱將軍者十余輩皆率衆降又與赤眉遇於葦陰戰

數十合降其將劉始王宣等五千餘人

銚期爲虎牙大將軍銅馬數十萬衆入清陽博平期

與諸將迎擊之連戰不利期乃更背水而戰所殺傷

甚多會光武救至遂大破之追至館陶皆降之

岑彭爲征南大將軍建武二年彭率傅俊臧宮劉宏

等圍秦豐於黎丘時田戎擁衆夷陵秦聞豐被圍懼

大兵方至欲降而妻兄辛臣諫戎曰今四方豪傑各

據郡國雒陽地如掌耳辛臣爲戎作地圍彭寵張步董憲公孫述等所得郡國云

雒陽所得如掌耳不如按甲以觀其變戎曰以秦王之強秦

也猶爲征南所圍豈况吾邪降計决矣四年春戎

乃留辛臣守夷陵自將兵沿江浙沔止黎丘刻期日

當降而辛臣於後盜戎孫寶從間道先降於彭而以

書招戎戎疑必賣已遂不敢降東觀漢記戎至期月

灼龜卜何光中圻遂止不而反與秦豐合彭出兵攻戎數月大破之其大

將伍公詣彭降

耿弇為建威大將軍光武建武五年夏光武以赤眉

延岑亂鉅昧水上八九十里僵尸相屬因復戰所殺

傷甚多會光武至鎖於軍門弇傳步詣行在所弇復

引兵至城群盜稱將軍十餘地悉平人皆公孫

馬援建武十一年為隴西太守時武都氐人皆公孫

述威略者援皆上復其侯王君長賜印綬帝悉從之

十三年武都參狼羗為寇援時以兵擊之至氐道縣

羗在山上援軍據便地奪其水草不與戰羗遂因亡

出塞餘種萬餘人悉降於是隴右清淨

耿秉為駙馬都尉明帝永平十七年與奉車都尉竇

固擊車師車師後王安得震怖從數百騎出迎固司

馬蘇安欲全功歸固即馳謂安得曰漢貴將獨有奉

車都尉天子姊婿固尚光武女滄陽爵為通侯當先

降之安得乃還更令其諸將迎秉秉大怒被甲上馬

麾其精騎徑造固壁言曰車師王降訖今不至請往

請梟其首固大驚曰且上將敗事乘厲聲曰受降如  
受敵遂馳赴之安得惶恐走出門脫帽抱馬足降東觀  
記白脫帽趨抱馬蹄乘將如詣固其前王亦歸命遂定車師而  
還

耿恭章帝建初二年為長水校尉時金城隴西羌反  
遣恭師五較士三千人副車騎將軍馬防討西羌恭  
屯抱罕數與羌接戰明年秋燒當羌降防還京師恭  
留擊諸未服者首虜千餘人獲牛羊四萬餘頭勒姐  
姐音紫子也切燒何羗等十三種數萬人皆詣恭降  
龐奮為廂門太守行度遼將軍和帝永元六年南匈奴

奴反畔脅立前單于屯屠何子奧韃日逐王逢侯為  
單于逢侯於塞外分為二部自領右部屯涿邪山下  
左部屯朔方西北相去數百里八年冬左部朝自相  
疑畔還入朔方塞奮迎受慰納之其勝兵四千人弱  
小萬餘口悉降以分處北邊諸郡後右溫禺犢王烏  
居數千人復畔奮及馮柱與諸郡兵擊烏居戰其眾  
降於是從烏居戰眾及諸還降者二萬餘人於安定  
北地

梁懂為西域副使尉殤帝延平元年冬南單于與烏  
桓大人俱反以大司農何熙行車騎將軍事申郎將

龐雄與副將羽林五較營士及發涇邊十郡兵二萬餘人又遼東太守耿夔率將鮮卑種衆共擊之詔僉行度遠將軍事龐雄與耿夔共擊匈奴莫韃日逐王破之單于乃自軍圍中郎將耿种於美稷連戰數月攻之轉急种移檄求救明年正月僉將八千餘人馳往赴之至屬國故城與匈奴左將軍烏桓大人戰破斬其渠師殺三千餘人虜其妻子獲財物甚衆單于復自將七八千騎迎攻圍僉僉被甲奔擊所向皆破虜遂引還虎澤三月何熙軍到五原曼栢暴疾不能進遣龐雄與僉及耿种步騎萬六千人攻虎澤連營

稍前單于惶怖遣莫韃日逐王詣僉乞降乃大陳兵受之單于脫帽徒跣面縛稽顙納質

張奐安帝永寧初爲安定屬國都尉初到職而南匈奴左與韃臺耆且渠伯德等七千餘人寇美稷東羗復舉種應之而與壁唯有二百許人聞卽勒兵而出軍吏以爲力不敵叩頭爭止之與不聽遂進屯長城收集兵士遣將王衛招誘東羗因據龜茲使南匈奴不得交通東羗諸豪遂相率與與和親共擊與韃等連戰破之伯德惶怖恐將其衆降郡縣界以寧耿舉順帝永建中爲烏桓較尉時鮮卑寇涇邊殺代

郡太守畢率烏桓及諸郡卒出塞討擊大破之鮮卑震怖數萬人詣遼東降

魏曹真為大將軍時安定民楊條等畧吏民保月支城真進軍圍之條謂其眾曰大將軍自來吾願早降耳遂自縛出三郡皆降

郭淮為征西將軍都督雍涼諸軍事與雍州刺史陳恭協策降蜀牙門將句安等於超上

王基為荊州刺史虜吳安北將軍譚正納降數千口於是移其降民置夷陵縣

鄧艾討蜀自陰平道先軍而進大破蜀軍乃至於維

劉禪遣使奉皇帝璽綬為箋詣艾請降艾至城都禪率太子諸王及諸臣六千餘人面縛輿觀詣軍門艾執節解縛焚襯受而宥之檢御將士無所虜畧綬納降附使復舊業蜀人稱焉先是鍾會初并諸葛緒之軍進攻劔閣不克引退蜀軍保險拒守鄧艾遂至綿竹大戰斬諸葛瞻姜維等聞瞻已破率其眾東入干巴會乃進軍至涪遣胡烈田續龐會等追維艾軍向成都劉禪詣艾降遣使勅維等令降於會維至廣都棲縣令兵悉放噐仗送節傳於胡烈便從東道詣會降

吳陸遜爲大將軍討關羽至公安劉備宜郡太守樊支委郡走諸城長吏及蠻夷君長皆降遜請金銀銅印以假授初附

呂岱代步騭爲交州刺史到州高涼賊率錢博乞降岱因承制以博爲高涼西部都尉

孫峻爲大將軍五鳳二年正月魏鎮東將軍毋丘儉前將軍文欽以淮西之衆西入戰於樂嘉閏月壬辰峻與驃騎將軍呂據左將軍留贊率兵襲壽春軍及東興聞欽等敗壬寅兵進於橐臯欽詣峻降淮南餘衆數萬口來降

晉王濬爲龍驤將軍武帝大康元年正月濬發自城都率巴東監軍廣武將軍唐彬攻吳丹陽克之濬自殄蜀兵不血刃攻無堅城夏口武昌無相支抗於是順流鼓棹徑造三山孫皓遣游擊將軍張象率舟師萬人禦濬象軍望旗而降皓聞濬軍旌旗噐甲屬天滿江威勢甚盛莫不破膽用光祿勳薛瑩中書令胡冲計送降文於濬曰吳郡孫皓叩頭死罪昔漢室失御九州幅裂先人因時畧有江南遂阻山河與魏乖隔大晉龍興德復四海關劣偷安未喻天命至於今者猥煩六軍衝蓋露次遠臨江渚舉國震惶儆息漏



刻敢緣天朝舍弘光大謹遣私署太嘗張夔等奉所  
佩璽綬委質請命壬寅濬入於石頭皓乃備亡國之  
禮素車白馬肉袒面縛銜璧牽羊大夫衰服士輿襯  
率其僞太子瑾瑾弟魯王虔等二十一人造於壘門  
濬躬解其縛受璧焚襯送於京師收其圖籍封其府  
庫軍無私焉

王戎爲豫州刺史建威將軍受詔伐吳遣參軍羅尚  
劉喬領前鋒進攻武昌吳將楊雍孫述江夏太守劉  
嗣各率衆詣戎降戎督大軍臨江吳牙門將孟泰以  
蕪春郝二縣降

高密王晷懷帝初爲使持節都督荊州諸軍事京兆  
流人王適與叟人郝維聚衆數千屯於寇軍畧遣參  
軍崔曠率將軍皮初張維等討適爲適所譎戰敗畧  
更遣左司馬曹攄統曠等進逼適將大戰曠在後畧  
自退走攄軍無繼戰敗死之畧乃赦曠罪復遣部將  
韓松又督曠攻適適乃降

庾翼成帝咸康六年爲安西將軍荊州刺史鎮武昌  
時石季龍汝南太守戴開率數千人詣翼降

桓溫爲安西將軍穆帝永和二年率衆伐蜀李勢勢  
衆大潰溫乘勝直進焚其小城勢遂夜遁九十里至

晉壽穀萌城其將鄧嵩督堅勸勢降乃面縛輿襯請  
命溫解縛焚襯送於京師  
戴施爲督護永和八年冉閔亂其子智以鄴城降得  
其傅國璽施以送之  
桓冲孝武時爲車騎將軍荊州刺史鎮江陵符堅使  
其將郝貴守襄陽冲使楊威將軍朱綽討之又使上  
庸太守郭寶伐符堅魏興太守褚垣上庸太守段方  
並降之  
桓石虔領河東太守進據樊城太守逐符堅兗州刺  
史張崇納三千家而還

前秦苻萇爲武衛將軍符堅遣萇率衆伐張天錫既  
陷其河會纏縮等城又降其將軍掌據天錫遣司兵  
趙充哲爲先鋒率勁勇五萬與萇等戰於赤岸充哲  
大敗天錫懼而奔還致牋請降萇至姑臧天錫乘素  
車白馬面縛輿襯降於軍門萇釋縛焚襯送之於長  
安諸郡縣悉降  
王猛爲符堅將堅遣猛等率步騎三萬攻慕容暉維  
州刺史慕容築於雒陽暉遣其將慕容臧容臧率精  
卒十萬將解築圍猛使梁成等以精銳萬人卷甲赴  
之大破臧於滎陽築懼而請降猛陳師以受之留郡

羗鍾金墉猛振旅而歸

宋劬劭爲輔國司馬時豫州刺史殷琰叛以劬假輔國將軍討之時琰賊降者明帝並送琰城下令與城內交言琰是人情沮喪琰將降先送義陽王休祐內人出城然後開門時琰有疾以板自輿與諸將帥面縛請罪劬並撫宥無所誅戮自將帥以下財物資貨皆還之纖毫無所失

陳宜黃縣侯慧紀爲荊州刺史後主禎明二年蕭琮尚書左僕射安平王蕭巖晉熙王蕭巖等率其部衆男女三萬餘口詣紀請降紀以兵迎之

後魏古弼大武時爲立節將軍進爲侍中吏部尚書典南部事奏與安原降東部高車于巴尼陂

尉元獻文時爲冠軍將軍宋薛安都以徐州內附元與孔伯恭赴援宋兗州刺史畢衆敬遣東平太守章仇欄詣軍歸款元並納之

李煥孝文時爲司空從事中郎時豫州刺史裴叔業以壽春歸附詔煥以本官爲軍司與楊大眼奚康生等率衆迎接煥至淮西叔業兄子植遣使送質煥等濟師入城撫慰民咸忻悅

盧淵爲安南將軍時涇州羗叛殘破城邑淵以步騎

六千衆號二萬徐行而追未經三旬賊衆逃散降者  
數萬口唯梟首惡餘悉不問

薛真度爲豫州刺史齊裴叔業以壽春內附詔真度  
率衆赴之真度至叔業來降

隋周法尚高祖時爲永州總管安集嶺南陳桂州刺  
史錢季卿南康內史柳璿西衡州刺史鄧暉陽山太  
守毛爽等前後詣法尚降陳定州刺史呂子廓據山  
洞反法尚引兵踰嶺子廓兵衆日散與千餘人走保  
巖嶮其左右斬之而降

韓擒虎開皇中爲廬州總管委以平陳之任甚爲敵  
人所憚及大舉伐陳以擒虎爲先鋒次於新林江南  
父老素聞其威信來謁軍門晝夜不絕陳人大駭其  
將樊巡曾世真田瑞等相繼降之晉王遣行軍總管  
杜彥與擒虎合軍步騎二萬陳叔寶遣領軍蔡徵守  
朱雀航聞擒虎將至衆懼而潰任蠻奴爲質若兩所  
敗棄軍降於擒虎將五百人直入朱雀門陳人欲戰  
蠻奴攜之曰老人尚降諸君何事衆皆散走遂平金  
陵

于仲文開皇中爲柱國將軍伐陳之後拜行軍總管  
以舟師自章山出漢口陳郢州刺史荀法尚魯山城

主誕法澄鄧沙彌等請降秦王俊皆令仲文以兵納之

郭衍爲左武衛大將軍從煬帝討吐谷渾出金山道納降二萬餘戶

唐嗣曹王皐德宗建中初爲衡州刺史初湖南圍練使辛京杲遣將王國良鎮武崗京杲侵刻之又虐其士卒國良以兵叛因據山守險劫行旅以自給詔徵荆南江西黔桂兵誅之二歲不下乃以皐爲潭州刺史湖南都團練使皐率諸軍至武崗國良阻險兵不得進皐乃謂諸軍曰國良恐京杲刻害本非反也其

情易見不如降之乃三遺之書國良因請降未得其情皐曰其心屈矣乃捨軍自稱使者乘偏舟直造其壘曰我曹王也國良遂出降後爲江西節度李希烈南侵皐表王鏐兼御史中丞都虞侯後皐攻安州使伊慎盛兵圍之賊懼請皐使至城中以約降皐使鏐懸而入旣成約殺不從者以出明日城開皐以其衆入焉

高崇文爲東川節度使憲宗元和六年破劉闢賊衆二萬餘於鹿頭關斬首千餘級大將降者十餘人拔鎮四所焚其營遂軍於鹿頭西大河之口以斷賊糧

道賊大駭是月賊綿江柵將李文悅以三千人歸順  
尋而鹿頭將仇良輔舉城降者衆二萬闕男方朔子  
壻蘇強先監良輔軍是日械繫送京師降卒投戈面  
縛者彌十數里遂長駟而南直指城都德陽等縣城  
皆鎮以重兵莫不望旗率服師無留行

李光顏爲忠武軍節度使元和十一年正月淮西賊  
將韓伯雄降於光顏三月賊將吳秀琳以文城柵兵  
三千降于李愬遂以秀琳之衆攻吳房四月賊之鄜  
城守將鄧懷金請以城降於光顏光顏帥師入其羅

城

後唐魏王繼岌同光三年九月爲西征都統伐蜀繼  
岌至鳳州僞武興軍節度使王承捷以鳳興文扶四  
州降大軍食其芻粟得糧四十萬兵士八千魏王給  
牒令攝武興軍節度使前一日康延孝李嚴至故鎮  
威武城僞指揮使唐景思吳鐸王權思部下兵四百  
降于延孝其軍史鄒彥謹都揮使李璠見城危方出  
歸投郭崇韜以初無降意皆伏誅以唐景思攝興州  
刺史城中除已殺戮得兵四千米麥一十七萬粟三  
萬威武城蜀道咽喉險固之地其城倚嘉陵江三面  
山險延孝旣拔故鎮殺其守將其衆萬餘縱其逸去

至興州僞蜀東川節度使宋光葆以梓綿劍龍普等五州來降武定軍節度使王承肇以洋蓬壁三州符印降其監軍使周永謙爲衆所殺興元節度使王宗威以梁開通渠麟等五州符印送降階州王丞岳納符印來降康延孝李巖至漢州僞蜀主王衍遣人送牛酒請降魏王至綿州王衍遣使上牋曰衍叩頭言伏以五帝三王竟歸於代謝有家垂國孰免其廢興苟天命之革新願轉禍而爲福衍誠惶誠恐叩頭伏以衍先人頃以受唐封冊列土坤維自霸一方干茲三紀乃者因夷門之構逆偶中國以喪君勉副推崇

遂開興崇衍謬爲世子獲紹舊基而以幼冲不得負荷尋遇大唐皇帝中興聖運再造鴻圖輝赫大明炤臨下土落修嘉好仰恃恩盟感覆燾於堯天將駟馳於禹貢忽審王師討伐部內震驚靡敢當鋒幸恩歸命伏惟殿下位尊上嗣德寶元良騰少海之波瀾動前星之秀彩親乘象輅勞履劍關已得萬民之歡心望恕斯人之死罪今則完全府庫守邊邑居率文武以陳誠與棺襯而納款伏惟殿下特弘哀鑒保證奏聞亦存諸典刑貯在肺腑庶幾先人之靈尤享血食之祀免支離於眷屬得敬養於庭闈惟聖君之明慈係殿

下之玄造衍無任危殆越戰懼激切之至謹差私  
署檢校司空行尚書兵部侍郎歐陽彬軍使韓知權  
等奉歲以聞十一月辛亥魏王軍到德陽僞蜀六軍  
使王宗弼遣使顏守倫上牋云蜀主王衍已出府第  
舉家遷於西宅王宗弼權稱西川兵馬留後安撫軍  
城以候王師又言宗弼欲至漢州迎奉天軍其僞六  
軍印公發遣公事且留未納翌日宗弼又遣人奉牋  
言昨蜀主與將較同議欵其僞樞密使宋光嗣景淵  
澄南院宣徽使周輅北院宣徽使歐陽晃等四人同  
出異謀惑亂蜀主臣當時梟首以徇謹令送納僞中

書令夔王宗範上牋曰臣生居穎許因先父建光啓  
中討陳敬瑄在蜀僞司空平章事王諧上牋曰臣因  
天復二年奏使西川遇車駕劫遷洛陽因留蜀部王  
子王衍遣使上表曰臣衍言臣先人建从在坤維受  
先朝寵澤一開土宇衍四十年頃以梁夔興災鴻圖  
版蕩不可助逆遂乃從權勉循衆人止王三蜀固非  
獲已未有所歸臣輒紹鉉基且安生聚臣衍誠憂誠  
懼頓首頓首伏惟皇帝陛下嗣堯舜之業揚湯武之  
師廓定寰區削平兇逆梯航聚集文軌會同臣方議  
改圖便期納欵遽聞王師致討實抱驚危今則將干



里之封疆盡爲王土冀萬家之臣妾皆沐皇恩必當  
與觀乞降負荆請命伏惟皇帝陛下廻炤臨之造施  
覆燾之私別示哀矜以安反側儻墳寢而獲祀實存  
沒以知歸臣無任望恩虔禱之至表稱乙酉年十一  
月二十日不稱僞年號甲寅魏王繼岌至漢州僞蜀  
六軍使王宗弼至乙卯魏王統大軍至蜀城北舍於  
王宗弼之別墅丙辰招撫使李嚴自蜀城引王衍及  
僞文武百官儀仗法物至蜀城北昇仙橋下王衍初  
乘竹輿自城中出至降所素衣牽羊草索繫首肉袒  
銜璧與觀後從宰臣百官衰經徒跣足以俟命魏王

降車取其璧郭崇韜解縛燔觀王衍率僞百官東北  
再拜謝恩訖又率衆拜魏王復拜崇韜韜答拜復拜  
李嚴嚴亦答拜丁巳大軍入西川城戒諸軍剽掠法  
令嚴峻軍士強括兵錢必論之以法市不改肆兵無  
血刃

冊府元龜

冊府元龜

將帥部

卷之四百二十七

十一

